

Josué

Josuéhuunoa Cununi Cuscan

Diosin Josué catonni

1 ¹Ascatan Moisés niyoatian a fu rafumisiton nan yopai cuscan ashomisi ahuun anu Josué. Moisés Diospan oinmati ipaoni. Ascano Moisés nano nocon Ifo Diosin Josué cunani.

²Yoiquin isca huani, —Uhuun oinmati Moisés man naa. Ascano min natian min caifoan aton niaifo min itiro. Un na mai shara mato inain min caifofo min nanno ato iyotiro unu Jordán pocufaitan nan mai shara fiishcaquin. ³Un Moisés yoiyoni cuscan un nannori mia yoi. Min na mai ano nocoaitian min cahuaacaini na mai ano nantifi un mato inanshquin.

⁴Tsoa istaipama anoashu chaicoin Líbano ano unu uhuapa nan Eufrates anoashu chaicoin nan Hititafoan aton mai chaicoin ununhuan nan Mediterráneo anori nantifi na mai un mato inain matona inon. ⁵Min niyoaitiancai tsoan mia nitu huatiroma. Un Moisés fu imisi cuscan un mi fu ipanaca. Uncai mia potapacunacama. Nan mian yopaitian un mi fu iishquin.

⁶Uhuun yora Israelifo min nan mai shara ano ato iyoshquin. Min shunifo un ato yoiyoni cusca na mai un ato inain. Ascacun uhuun curushhuunshon un mia amapaiyai cuscan huafafainhuun. Shinanquin isca huahuun, “Uhuun Ifo

Diosin ua yonoo cuscan un atiroran,” ishon shinanhuun. ⁷Afanan un mia yoi uhuun curushhuunshon un mia amapaiyai cusca huafafainhuun.

“Uhuun Ifo Diosin ua yonoo cuscan un atiroran,” ishon shinanhuun. Moisés mia yonoo cuscan nantifi ahuu. Nanfo cachiquiri huayamahuu. Ahua futsafo tanayamahuu. Min ascaino nantifi min acai cuscan shara iishquin.

⁸Un mato yonoo cusca nan cunua oinfafaihuun. Min nomuranshon nan cunua cuscan shafatifi non yamutifiri shinanhuun. Min nanscaifin nan cunua cuscan min aashquicai. Ascaino nanti min acai cuscan shara iishquin. Min isharacointiro. ⁹Un mia yonoo cuscan uhuun curushhuunshon un mia amapaiyai cuscan huafafainhuun. Min raquira caino un mi fu cai. Ascacun shinanquin isca huahuu, “Uhuun Ifo Diosin ua yonoo cuscan un atiroran,” ishon shinanhuun. Futsafoqui musuyamahuun. Ascaciafun shinanquin isca huayamahuu, “Uhuun Ifo Diosin ua yonoo cuscacai un atiromaran,” ishon nannori shinanyamahuu, —ishon nocon Ifo Diosin Josué yoini.

Josué itishara huani na mai shara ano iquicashquin

¹⁰Ascano nan Upa Diosin yoini cuscan Josué Israeli niaifo patasharinoafu

cunani ato yoishquin. ¹¹—Nocon caifofo nantifi ato yoicahuun ato tushu non nantifi aton ahuafo itishara huanonfo. Osha rafu non fusti finontan non unu Jordán pocufainnicai nan mai nocon Ifo Diosin noco inainton non fiicai nocona inon, —ishon Josué ato yoini.

¹²Ascatan Josué Israelifo aton mani rafu non fusti cunani. Rubén ahuun funafo cunafain Gad ahuun funafo cunafain Manasés ahuun funafo atirifiri cunani. Ato yoini isca huaquin.

¹³—Nocon Ifo Diospan ahuun oinmati Moisés mato yonoa cuscan ointiaquimayamacahuun. Man Moisés tapimana man unu Jordán ocuma futsa ipaima. Man nuquiri ipai mato pushu rasi nuquiri man iishquin. Ascano Moisés mato cumaquin isca huani, “Nocon Ifo Diosicai afanan mato iyofoanfafainnima. Nantian mato tunumashquin nan mai shara mato inain nanno man inon. Man unu Jordán ocuma futsa ipaiyamaino shara itiroran,” ishon Moisés mato yoini.

¹⁴Ascano maton ahuinfo non maton facufo non maton inafu nuquiri unu Jordán fari oaiquiri nituyotirofo. Ascafia nocofunu mutsispafoan rucu unu Jordán pocufaintiro maton yora futsafo futan nan mai shara fiishcaquin. Ascano maton ashi non maton piacatifoya man fotiro nan mato noicasmaifo rutushcaquin.

¹⁵Ascatari unu Jordán ocuma futsa maton caifo mani futsafoya foyotacahuun nantifi nan caifo futsafo na mai shara icafo ato cuyoshcaquin. Ascano man nuquiri ishara cusca maton caifo mani futsafo na mai shara ano isharatirofo. Nan maton yora mani futsafoan nan mai fiaitian manfin afanan nuquiri unu Jordán fari oaiquiri futiroquin Moisés mato yoyoni cuscan man mau huafain pushu huafain nuno

isharashcaquin, —ishon Josué ato yoini.

¹⁶Nannori nicacatan yoiquin isca huanifo,

—Min noco ahuafo yonoai cuscan non aashquin. Nan min noco nichiaiquiri non catiro. ¹⁷Moisés noco yonoa non nanscacoimisi cuscan nanscarifiai min noco yonoai cuscan non aashquin. Ascano nocon Ifo Diosin Moisés fu ipaoni cuscan nanscariai mi fu ipapainon. ¹⁸Min tsain noco yoi ai cuscan huafain min noco yonoshquin ai cuscan futsan nicacasmaiton non rutushquin. Ascano Diospan curushhuunshon mia amapaiyai cuscan huafafainhuun. Shinanquin isca huahuu, “Uhuun Ifo Diosin ua yonoa cuscan un atiroran,” ishon shinanhuun, —ishon Josué yoinifo.

**Josué nocofunu rafu nichini ahuu
cuscaramainquin na mai Jericó ano
tapishcaquin**

2 ¹Ascano Josué Israelifo Sitim mai ano nocofunu rafu nichini. Ato yoini isca huaquin, —Unu Jordán ocuma futsa pocufaintacahuun ahuu cuscaramain nan maiquin oinsharatacahuun noco tapimashcaquin. Man Israelifoquin tsoashta tapimayamacahuun. Nan pushu rasi Jericó anoafu oinsharacoincahuun, —ishon Josué ato yononi.

Nicacatan nan rafu Sitim anoashu focani Jericó ano noconifo. Nanno ainfo furoma ahuun anu Rahab ahuun pushu muran oshanifo. ²Nan nocoifoan futsan ato oinni. Ointan Jericó niaifoqui chanini. Yoiquin isca huani, —Mun oian Israeli nocofunu rafu na yamu nuno oa noco mai oin fuafo aton caifofo nocohuunoa tapimashcaquin fuaforan, —ishon niaifo yoini.

³Yoiaiton nicatan niaifohan Rahab icano nocofunu nichini Rahab yoiquin isca huanon, —Nan nocofunu rafu min pushu muran iquia. Nan rafutan noco fuparapai fuafo. Nocon mai oin fuafo aton yorafo nocoahuonoa tapimashquin noco rutunonfo nocon mai fiishcaquin. Ascacun nan nocofunu rafu chifi caimahuun, —ishon yoini.

⁴Niaifohan nannori yoifiacai Rahab nan Israeli nocofunu rafu onuni. Ascashon cumaquin isca huani,

—Icon nan nocofunu rafu uhuun pushu muran iquifiafo. Ascafia uncain tapiama raquiashumain fuafoquin.

⁵Ascano nan fari iquiaitian nan pushu rasi ahuun cunu caincaiti fupoaitian uhuun pushu murannoashu foafo. Raniashu foafomainquin uncai tapiama. Ato mufainrisca huatacahuun man atoqui nocoriscatiromainquin, —ishon Rahab ato yoini.

⁶Nannori ato fomantan ahuun pushu fomancaya ato onuni. Ihui fichifo shinainfo ananmanri ato onuni.

⁷Nan nocofunu ranan niaifohan ato nichiaino Rahab pushu anoashu ichonifo unu Jordán noamashta ano nan Israeli nocofunu rafuqui nocoriscapai. Focatan pushu rasi ahuun cunu caincaiti fuponifo. ⁸Ascano nan Israeli nocofunu rafu oshataifoma Rahab pushu fomancaya cani ato fu tsainquicai.

⁹Ascashon ato yoini isca huaquin, —Mun tapia maton Ifo Diosin nocon mai min caifo inain. Uhuun caifo min caifoqui ratucoian. Nantifi uhuun mai anoafasi matoqui musucani. ¹⁰Man non nica man Egipcio mai ariashu fuaitian ununhuan ahuun anu oshin man pocuataima maton Ifo Diosin unu pashcanan huashon mai mutomatanaino man ununhuan pocusharafainni. Amorreofohan niaifo rafu Sehón yafi Og unu Jordán fari oaiquiri icafo man

rutuni cuscan man non nicamisi. Aton yorafoya man ato rutuquin cuyoni.

¹¹Ascano nan nicain non fasi ratui taritarica. Nan nicatacai tsoa matoqui nocopaiyama maton caifofo rutushcaquin. Mun tapia maton Ifo Diosicai tsoan finontioroma. Nantifi nai murannoa iquifain mai anoafori iquina.

¹²⁻¹³Ascán maton Ifo Diosin ahuun anuhunshon ua yoicahuun un mato shara hua cuscan marifi man ua shara huanon. Ua non uhuun yorafori man afanan nuno Jericó ano nocoaitian noco shara huashcaquin. ¿Man ua ahua ismاتيromun man uhuun caifo cuyoaitian ua non uhuun upa non uhuun uhua non uhuun ochifo non uhuun ushtofo non uhuun chipifo non uhuun chicofo non aton yorafori shara huaquin man noco rutunonma? ¿Man ua ahua ismاتيromun man ua non uhuun yorafo nocon caifo man cuyoaitian un mia icoinra huanon man noco rutunonma? —ishon Rahab ato yoini.

¹⁴Ascaiton cumanifo isca huaquin, —Non nuno anocai min caifo min ato tapimayamaino noco rutucuanafu. Nanscarifiaquin norifi mia non min yorafoya non mato numashquin man nanonma. Nocon Ifo Diosin maton mai noco inaintian non mia yoia cuscan non mato numashquin man nanonma, —ishon yoinifo.

¹⁵Nannori yoiaifohan nicatan Rahab ato numani. Rahab ahuun pushu nan Jericó pushu rasi aton cunu cuyacoin ano potasinan ini. Ahuun pushu fomancaya ahuun cunu tsucashon nan nocofunu rafu cuyacushon rusfipan ato fotomani. ¹⁶Ascashon ato yoini isca huaquin,

—Machifo ano ichoriscatacahuun. Nanno osha rafu non fusti onucahuun. Ascano nan yorafoan mato funaifo

pushu rasi nasoaitian man fosharatiro, —ishon Rahab ato yoini. ¹⁷⁻¹⁸Ascaiton cumaquin isca huanifo, —Min noco yoia cuscan non mia yoiyoni. Ascafia nocon caifo mato mai ano nocoaitian min cunu shoi anoshon min noco fotomana ano min rusfi oshin nannoshon min noco ismayamaiton non mia yoia cuscacai non huatiroma. Nocon caifoancai tapitiroma min icano mia non min yorafo numashcaquin. Nantianri nantifi min yorafo upa non uhua non min ochifo non ushtofon non nantifi min yorafo min pushu muran iquitirofo naashcaquima. Man ascayamacai nocohuun nuama uhuun caifoan mato rutushquicani.

¹⁹Min yorafo yoihuun non matoqui nocoaitian min pushu murannoashu chifi cainyamacahuun. Nan yora chifi caianfin naashquiquin nocohuucai nuama. Atohuun nuushquin nan naifo cuscan. Ascano min yorafo mi fu pushu muran icafo nocon caifoan ato ahuuscaru huanu nocohuun nuutiro.

²⁰Ascafia non nuno min pushu muran iquia min caifo min ato tapimacun noco rutuafo non mia yoia cuscan non atiroma. Min asca huaiton noncai mato numaimaran, —ishon nan Israeli nocofunu rafutan Rahab yoinifo.

²¹—Man ua yoia cuscan un nannorisi shinain. Uncai uhuun caifofo yoishquima.

Natian fosharatacahuun, —ishon Rahab ato yoini. Foafono Rahab ahuun cunu shoi fomancaya ano rusfi oshin nushani.

²²Ascano nan Israeli rafu machifo ano osha rafu non fusti onunifo. Nan Jericó anoa nocofunfoan ato funafoanfainni. Fai cusumunri ato funafiaquicai ato fuchinifoma. Ascatan nan icafoanno nasonifo. ²³Ascatan nan Israeli rafu machifo tunanmanri

focaquin unu pocufainni fonifo. Ahuun caifofo icafoanno nococatan Josué pushu ano noconifo nantifi nan finoanfo cuscan atoqui chaninifo. ²⁴Yoiquin isca huanifo, —Nan yora Jericó anoafonocoqui fasi ratucoianfo. Ascan nocon Ifo Diosin nantifi nan mai noco inanshquin nocona inon, —ishon nan rafutan aton caifo yoinifo.

Israelifon unu Jordán pocufainnifo

3 ¹Ascatan iyoconaino Josué fu nantifi ahuun caifo Israelifo pushu rasi ahuun anu Sitim anoashu unu Jordán cusumunri fonifo. Nanno pocuafotaima nanno iyopaonifo. ²⁻³Osha rafu non fusti finontan Israelifo ato niaifo patasharinoafon pano pushuti ano fonifo nantifi aton caifofo tapimashcaquin isca huaquin, —Diosin noco yononi norifi non nannori shinanoncahuun. Noco yononi cuscan toquiri sapa rafuqui noco cunushoni. Nan toquiri sapa rafu casho muran nanuni.

Ascano nan Levitafoan nocohuunshon nocon Ifo Diosi cufinmisifoan nan casho unu cusumun iyashon foaifoan oinquin ato mufaintacahuun. ⁴Mancai nunoashu raqui fomisima. Ascacun ato mufainfafaincahuun. Man caiquiri marifi man ato fu catiro fai tapishcaquin. Ascatari nan casho chaimashta fishtayamacahuun. Kilometro fusti nitucahuun. Nan casho chaima shara man nitiroran, —ishon niaifo patashinoafon yoinifo.

⁵Ascatan Josué Israelifo yoini isca huaquin, —Funamari man ahuara sharafo man oinyomisima cuscaran nocon Ifo Diosin ahuun curushhuunshon mato ismashquin. Ascacun itisharacahuun. Diosi ismacahuun manfin ahuun yoracoinfoquin. Mato yonoa cuscan acahuun, —ishon Josué

ato yoini. ⁶Nantianri Israelifohuunshon nocon Ifo Diosi cufinmisifo Josué ato yoini isca huaquin, —Nan casho iyashon maton yorafo ano rucu fotacahuun, —ishon ato yoini.

Ascatan nan Josué ato yonoa cuscan nan nocon Ifo Diosi cufinmisifoan aton yorafo finonfaitan rucu fonifo. ⁷Ascatan nocon Ifo Diosin Josué yoini isca huaquin, —Na shafata un min caifofo ismai min aton niaifo sharacoincun. Un asca huaiton tapitirofo un Moisés fu ipaoni cuscan un mi furi ipanaca. ⁸Nan nocofunufu matohuunshon ua cufinmisifo nan casho foaifoan ato yoihuun isca huaquin, “Man unu Jordán cusumunri nocotan unu muran niyocahuun,” —ishon nocon Ifo Diosin Josué yoini.

⁹Ascano Josué Israelifo yoini, —Uqui fucahuun nocon Ifo Diosin ahuun tsain nicasharashcaquin. ¹⁰Nantofin na mai shara noco inanshiquin nan mai anoshon caifo futsafo nocomaquishon potashquin. Cananeofu potafain Hititafo potafain Hevefo potafain Ferezefo potafain Gergesefo potafain Amorreofo potafain Jebusefo potashquin. Nan ato potacun man tapitiro maton Diosi nan niafin mato fu icaquin. ¹¹Ascan Diosin noco yononi cuscan norifi nannori non shinanon. ¡Shinancapon! Nocon Ifo Diosin maifoti ato Ifo icano nan toquiri sapa rafuqui noco cunushoni cuscan nan casho muran nanua. Levitafoan rucu foyoifocani unu Jordán ano tau iquiyoi focani. ¹²Ascacun natian maton caifo nan doce mani futsafoti nocofunu fusti catonhuun. ¹³Ascano Levitafoan nan casho muran nocon Ifo Diosin tsain foifocani unu Jordán iqui tauaifotiancai nan unu afanan mananquirinoashu afashquima. Natian shaturiscatashquin unu ano machihuan iriscatashquiran, —ishon Josué ato yoini.

¹⁴Ascano Israelifo icanoashu foaifotian unu Jordán pocufainaifotian nan Israelifohuunshon nocon Ifo Diosi cufimisifo rucu fonifo. Nan casho ato rucu foshonifo. ¹⁵⁻¹⁶Nan ato yono chituaifotian nantianri faitanhuanmisi ini. Ascafiacaí nan Israelifohuunshon nocon Ifo Diosi cufinmisifo nan casho foaifoanno nan unu ano iquitauaifoannocai mananquiri afanan unu afanima. Nantian shaturiscaino nan unu ano machin huariscatani. Pushu rasi ahuun anu Adam nan mai Saretán chaimashta unu Jordán nannocai afanan unu afanima. Nan maiquiri unu Jordán ununhuan ahuun anu Arabá murancai afanan unu afanima.

Ascano nan unu Jordán nutsotan mai mutotanaino nantifi Israelifoan pocufainifo ocuma futsa Jericó chaimashta mapunifo. ¹⁷Ascan nantianri nan Israelifohuunshon nocon Ifo Diosi cufinmisifo unu Jordán nushmancayan mai mutoano nan cashoya ninifo. Nanno niyoafoanno nantifi Israelifoan pocufainquin ato finonfainnifo. Ascano nannoshon nan Israelifohuunshon cufinmisifoan niishon manayonifo nantifi aton caifofo unu Jordán ocuma futsa nocosharanonfo.

Unu Jordán mai muto ano doce toquiri uhuapa fishon fonifo

4 ¹Ascano nantifi Israelifoan unu Jordán pocusharafainifo nocon Ifo Diosin Josué yoini isca huaquin, ²—Nantian min caifo nan doce mani futsafo nocofunu fusti rasi catonhuun. ³Ato yoihuun nan matohuunshon ua cufinmisifo unu nushmancayan mai mutoano niafo. Nannoa toquiri uhuapa fiipanonfo. Ascatan nan yamu nan oshaifoanno nan doce toquirifo putsainninonfo, —ishon nocon Ifo Diosin Josué yoini.

⁴Nannori nicatan Josué nan doce nocofunifo cunani aqui funonfo.

⁵Ascano ato yoini isca huaquin, —Rucu fotacahuun. Mato cachori nan nocon Ifo Diosin noco cunushoni cuscan casho muran noco Diosi cufinshomisifoan foifocani. Nan unu Jordán nushmancayanoa toquiri uhuapa fusti rasi fiipacahuun. Ascano manfin Israeli nocofunifoan nan manifeston doce toquiri fusti rasifain man fitiroquin.

⁶⁻⁷Ascan chipo maton facufoan mato yocaiton isca huaquin yoicahuun, “¿Ahuuscai na doce toquiri nuno putsamuiniamun?” ishon mato yocaiton man ato tapimatiro isca huaquin, “Non unu Jordán pocufainnaitian nocon Ifo Diosin noco ashoai cuscan ahuun cunu casho muran non foaino unucái mananquirinoashu afanan afanima. Shaturiscatani. Ascacun non nuno nan doce toquiri putsamuinia nocon Ifo Diosin noco ashoni cuscan non ointiaquimapacunacamaran,” ishon non nocon facufo yoishquin, —Josué ato yoini.

⁸Nan nicacatan Josué ato yoini cuscan huanifo. Israelifoan ato manifeston nan doce nocofunifoan unu Jordán nushmancayanoa doce toquiri uhuapa fiinifo nan oshaifoanno focashon nanno putsainishcaquin. Nannori nocon Ifo Diosin Josué yononi. ⁹Ascan Israelifohuunshon nocon Ifo Diosi cufinmisifoan nan casho focani unu cusumun niafo. Nantianri nocofunu futsafoan doce toquiri fiinifo. Josué ato toquiri nannoshon putsainini. Nan toquirifo putsamuinia natianri nanno.

¹⁰Nan nocon Ifo Diosin Moisés yononi cuscan nannori Moisés Josué yoini. Ascano nantifi nan yonoa cuscan huacoinnaino Israelifohuunshon nocon Ifo Diosi cufinmisifoan unu Jordán nushmancayan niafoanno Israeli

futsafoan unu ocuma futsa pocufainifo. Ascatan nantifi Israelifoan unu pocurisca huafainifo. ¹¹Ascano nantifi Israelifoan pocufainaino atohuunshon nocon Ifo Dios cufinmisifo nan cashoya ocuma futsa focashon nantifi I

¹²Nantianri Moisés ato yononi cuscan Israeli mani futsa rafu non fusti nan Rubén ahuun funafo non Gad ahuun funafo non atirifi Manasés ahuun funafo aton ashifo non aton piacatifoyashon ocuma futsa pocufainifo. Aton caifo Israelifoan ointaifi rucu pocufainifo.

¹³Cuarenta mil yora cuana aton ashifoyashon futsafo rutui focaquin pocufainifo Jericó mai mispa ano noconifo. ¹⁴Ascano nan shafata nocon Ifo Diosin aton nomuran shinanmana cuscan Josuéhuunoo Israelifoan shinansharanifo. —Noco murancai tsoa futsa Josué cuscaraman, —ishon ahuunoo yoinifo. Nan Moiséshuunoo shinansharanifo cuscan huaquin Josuéhuunooari nan niyoano nannori ahuunoo shinansharanifo.

¹⁵Ascan nocon Ifo Diosin Josué yoini isca huaquin, ¹⁶—Matohuunshon ua cufinmisifo yoihuun uhuun tsain nan casho muran focaquin unu Jordán ano mapucahuun, —ishon nocon Ifo Diosin Josué yoini.

¹⁷Ascashon Josué ato yoini, —Unu Jordán ano mapuyocahuun, —ishon ato yoini. ¹⁸Nannori nicacatan Josué ato yoia cuscan anifo. Nan Diospan tsain na casho muran focatan mapunifo. Ascano nan mai mutoano niafoanno unu Jordán afanan afafuranaino unu yosiriscatani. Nantian faitanhuariscatani.

¹⁹Ascano oshu fusti ahuun osha mucu rafuti Israelifo unu Jordán anoashu focani Gilgal mai ano noconifo. Nanno fari oaiquiri Jericó pushu rasi ini. ²⁰Nan Gilgal anoshon Josué nan doce toquiri unu Jordán nushmancayanoa fiinifo

putsainiishcaquin. ²¹Ascano Josué Israelifo yoini, —Chipo fari ichapa finontan nocon funafoan aton apafo yocashquicani, “¿Ahuuscaimun nuno toquirifo putsamuiniaquin?” ishon yocashquicani,

²²Ascaiton aton apafoan cumatiro isca huaquin, “Maton shunifoan unu Jordán ano mai mutotanaino pocufainnifo,” ishon apafoan cumatirofo. ²³Nocon Ifo Diosin nocohuunshon unu Jordán nutsoriscatani non nantifishon pocufainon. Nan ununhuan oshin noco nutsomashoni cuscari nan unu Jordán nanscarifi huaquin noco nutsoshoriscatani. ²⁴Noco asca huashoaiton nantifi manifotifain tapinonfo nocon Ifo Diosi ahuun curushhuunshon ahuamamishti huatiro. Ascacun norifi nocon Ifo Diosihuunoo non shinansharapacunaca noco yonoai cuscan non anon, —ishon Josué ahuun caifofo yoini.

Nocon Ifo Diosin ahuun oinmatifo a fu nai muran ica aton niaifo Josuéqui noconi

5 ¹³Josué Jericó chaimashta nishon nocofunu ahuun nopo tsomashu nia oinni. Ascano Josué aqui caashon yocani,

—¿Min no fu ipaiyamarai noco noicasmaifo fu min iquimun? —ishon yocaiton.

¹⁴—iMa! Un mato fu iyamacain nan mato noicasmaifo fucai un icama. Unfin Ifo Diosin ahuun oinmatifoan nai murannoo aton niaifoquin, —ishon yoini. Nan nicatan Josué maiqui fuoshopacuni ahuunoo shinansharaiton yoini. —Mian yonopaiyai cuscan un mia ashoriscatiro. ¿Ahua mian yonopaimun? —ishon yocaiton.

¹⁵—Nan min nii ano nocon Ifo Diosin mi fu nuno. Ascanofin nuno sharaquin. Min sapato pucahuun min Diosin

Ifoacoinna cuscan mia yoiyai cuscan min anon. Ascashon min ismasharanon, —ishon Diospan oinmati nai murannofo aton niaifoan Josué yoini.

Israelifoan Jericó anofo cuyoshquiai cuscan

6 ¹Ascan pushu rasi Jericó anofo Israelifoqui fasi musucani. Aton pushu rasi cunu cuyacoin tarati huayacuna. Nan cunu ahuun shoi caincaiti fupocoinnifo. Ascanocai tsoa iquiyamacai tsoaricai Jericó murannoashu chifi caintirofo inima. ²Ascano Ifo Diosin Josué yoini isca huaquin, —Un yonoa cuscan Jericó anoafocai miqui fotirofoma. Aton niaifo non aton ranushumufo uhuunshon min ato cuyoshquin. ³Min yora ranushumufo futan osha mucu fustiti non mucu foshca fusti nan shafatifi Jericó tarati huaquin fusti huacahuun. ⁴Focashon nan siete nocofunufu matohuunoo Ifo Diosi cufinmisifo yoihuu chashoan masho manuti nan tsomafo rucu foaifoanno acachori nan cashon Diospan tsain amuran nanua futsafoan fotirofo. Ascano ato cachori ranushumufo fononfo. Ascano nan septimo dia shafa ato yoihuun aton yorafo futan Jericó siete tarati huayacucatan ato manutifo chaan chaan anifo.

⁵Ascano ahuun unutaqui aton manutifo fasi chai manuaifoanno nantifi yorafo oi ashcafinin cunatiroforan ishon. Nannori ato yoihuun. Ascan man manutifo fasi achacoin manuaino nantifi yorafo oi ashcafinin cunaino nan cunu Jericó tarati huafo pacuriscashquin. Ascano min yorafo nantifi Jericó muran cayacafi iquishcaniran, —ishon nocon Ifo Diosin Josué yoini.

⁶Nan nicatan Josué ahuun yorafo ichanan huani nocon Ifo Diosin yonoa

cuscan ato tapimani isca huaquin,
—Nan casho muran Diospan tsain
nanua iyainifoancahuun. Mato rucu nan
siete nocofunufu nocohuunshon nocon
Ifo Diosi cufinmisifo manuti tsomashu
fotiroforan, —ishon Josué ato yoini.
⁷Ascashon Josué nantifi Israelifo yoini
isca huaquin, —Natian non
fononfocahuun. Jericó tarati
huayacufoancahuun. Nocofunufu
ashifoya rucu caino acachori nan casho
nocon Ifo Diosin tsain Israelifo yoiyoni
cuscan a muran futsafoan iyacashon
fotiroforan, —ishon Josué ato yoini.

⁸Josué ato yoia cuscan nicacatan nan
siete nocofunufu Israelifohuunshon nocon
Ifo Diosi cufinmisifoan manuti tsomashu
rucu fonifo aton manutifo manufoi fonifo.
Futsafoan nan casho amuran Diospan
tsain Israelifo yoiyoni cuscan a muran
foaino acachori fonifo. ⁹Ascano nan
ranushumuafu ashi tsomafo tauu rucu
fonifo. Ascano acachori nocofunufu
Israelifohuunshon nocon Ifo Dios cufimisifo
fonifo aton manutifo tsomashu.
Acachoriri futsafoan nan casho a muran
nocon Ifo Diosin tsain nanua iyashon
fonifo. Ascano acachori ranushumuafu
ashi tsomashuri fonifo. Nantishotapiquin
nan manutifo tsomashon manunifo fasi
achacoin. ¹⁰Ascano Josué ato yoini isca
huaquin, —Non Jericó tarati huaitian
puusiyamacahuun. Ahuashta
yoiyamacahuun. Un chipo mato yoiaitian
man oi ashcafinin cunatirofan, —ishon
ato yoini

Israelifoan Jericó anoafu cuyoni

¹¹Ascan Josué ato yonoa cuscan nan
casho Ifo Diospan tsain amuran iyashon
focaquin Jericó tarati huaquin fusti
huatan afanan Israelifo aton pushu rasi
ano nasonifo nanno oshanifo.

¹²Ascan iyoconaino Josué moitan
funinacahuani. Nantianri nocofunufufoan

nan Israelifohuunshon nocon Ifo Diosi
cufinmisifoan nan casho nocon Ifo
Diosin tsain amuran nanua
iyainifoantan fonifo. ¹³Nan siete
nocofunufu Israelifohuunshon nocon Ifo
Diosi cufimisifo aton manuti tsomashu
manuyanan fonifo. Ranushumuafu aton
ashiya rucu foaifono. Acachori
manumisifo fonifo. Nan casho nocon Ifo
Diosin tsain amuran nanua acachoriri
Israeli ranushumuafu aton ashiya
foyacunifo. Jericó taratihuaayacunaifono
nantishotapiquin manutifo
manuacunifo. ¹⁴Ascano iyoconaino
afanan pushu rasi Jericó tarati
huayacuquin fusti huanifo. Ascatan
Israelifo afanan aton pushu rasi nan
icafoanno nasonifo. Osha mucu fustiti
non mucu foshca fusti nansca huanifo.

¹⁵Nan septimo día iyoconaino
funinifoancatan nan amisifo cuscan
afanan nansca huanifo. Tarati
huayacuquin fusti huatamarocon Jericó
siete tarati huayacuquin huanifo.

¹⁶Ahuun unutaqui nan nocofunufu
Israelifohuunshon nocon Ifo Diosi
cufinmisifoan aton manutifo manuaino
Josué nantifi Israel futsafo yoini isca
huaquin, —Natian nocon Ifoan nan
pushu rasi Jericó noco inain. Ascacun oi
ashcafinin cunacahuun. ¹⁷Non nantifi
Jericó murannoafu cuyonon. Nocon Ifo
Diosin noco yonoa cuscaai non ahuara
a murannoa fitiroma. Nocon yora
rafutan Jericó muran noco oinshonaino
nan ainfo furoma Rahab ato numa
ahuun caifofuato ato achinonfoma.
Ascacun Rahab ahuun yorafoya a fu
ahuun pushu muran icafocai non
rutuima.

¹⁸Ascafia nannoa ahuara futsafo
nantifi cuyoi futsushquin. Ascacun
ahuara fiyamacahuun matona inon.
Tsoan nansca huaifin arifi naiquin.
Norifi ahuunoashu nantifi Israelifo non

omitsiscatiro. ¹⁹Ahuarafo cuno osho facafacaitsa mucufain orofo mucufain cuno ahuun anu bronce mucufain cuno futsafo ahuun anu hierro mucushon machicahuun nocon Ifo Diosinna inon, —ishon Josué ato yoini.

²⁰Ascan nan manutifo manuaino nantifi Israelifo oi ashcafinin cunanifo. Oi ashcafinin cunaifoanno Jericó ahuun cunu cuyacoin nantifi pacui paoinqui futsunifo. Ascano nantifi Israelifo pushu rasi muran iquinifo nan murannofo ato rutunifo. ²¹Israelifoan nantifi Jericó murannofo rutuquin cuyocoinnifo. Ascan nan tushuafori ato rutunifo. Nocofunufu non ainfofo non facufo non anifofo non moifo non chashoanfo non burrofori nantifi rutuqui futsanifo.

²²Ascatan nan nocofunu Jericó oinqui tauhuaiyonifo rafu Josué ato yoini isca huaquin, —Man nan ainfo furoma yoyoni cuscan ahuun pushu muran iquicahuun. Nan non ahuun yorafoya chifi cainmacahuun, —ishon Josué ato yoini. ²³Nan Josué yoya cuscan nan nocofunu rafu Rahab pushu muran iquini. Nan non ahuun apa non ahua non ahuun ochifo non ahuun ushtofu nan ahuun yorafoya ato chifi cainmani. Israelifo icafoanno pasoato ato nichinifo.

²⁴Ascano nan pushu rasi Jericó yafi nan murannofo nantifi coi futsuni. Ascafia nan cuno oshopa facafacaitsafo non orofo non ahuafo cuno ahuun anu bronce non cuno hierrofo nantifi ichahuashon machinifo. Nocon Ifo Diosin pushu muran huanifo nanfohuunua chipo ahuafo huashcaquin. ²⁵Nan ainfo furoma Rahab Israeli nocofunu rafu ahuun mai Jericó oinfofoanno ato onuni tsoa ato rutunonma. Nanscacuricaí Josué nan non ahuun yorafoya non ahuun ahuafo ahuusca huanima Israelifo fu inonfo. Nantianri ato fu inifo.

²⁶Ascatan nan Jericó mai cuyonitian Josué ato yoini isca huaquin, —Nan ratoran nocofunun afanan Jericó ano pushu rasi huapaiyaiton nocon Ifo Diosin nan onaintimapainon naanon. Nan afanan futsan nuno Jericó mai ano pushu rasi huapaiquin pushu quishi nichiaitian ahuun facu iyoa naashquin. Nan ahuun cunu caincaiti huaitian ahuun facu chipocu naashquinran, —ishon Josué yoini.

²⁷Ascano nocon Ifo Diosin Josué fu rafumisi cuscan. Nantifi maifotishon Josuéhuunua nicamisifo nan nocofunu shararan huanifo.

Nocofunun ahuun anu Acán chaca huani cuscan

7 ¹Ascatan Israelifoan yoinifo Jericó murannofo ahuafo sharamishti Diosina fusti itiro. Ascafia nan mani futsa Judá ahuun yorafo Acán chaca huani. Acán apa Carmi ahuun shota Zabdi ahuun shota apa Zara. —Nocon Ifo Diosin non nantifi cuno sharafo non inain ahuuna inon, —ishon Israelifoan yoifianifo Acán nan ahuafo futsa fini. Ascano nocon Ifo Diosin Israelifoqui fasi sinani.

²Josuécai tapinima nocon Ifo Diosin atoqui sinai ahuun caifofo Jericó anoshon pushu rasi ahuun anu Hai ano ato nichini. Nan Hai Bet-avén chaimashta. Fari oaiquiri pushu rasi Betel chaimashtari ini. Josué ahuun caifofo yoini isca huaquin, —Hai mai ano oinyotacahuun ahuu cuscaramainquin. Oinshon noco tapimai fucahuun, —ishon Josué ato yoini. Nannori ato huaiton nicacatan fonifo Josué ato yonofo cuscan oinfocani.

³Ointani Josuéqui nasonifo aqui chani fucani. Yoiquin isca huanifo, —Nan Hai ano yorafo fusti rasi. Ascacun atirifoan nunoshon noco manatiro. Dos mil

iyamarai tres mil fusti non Hai ano catiro ato rutuqui cuyoshquin, —ishon yoinifo.

⁴Ascatan tres mil Israeli nocofunufu Hai ano fonifo. Ascafia nan Hai ano icafoan ato ichonifo. ⁵Ascano Israelifo ichonifo Haifo icanoashu nan chai toquirifo ari ichonifo. Hai icanoafoan treinta y seis Israeli nocofunufu tunanmanrishon ato rutunifo. Ascano Israelifo fasi ratucoinifo.

⁶Ascano nan nicatan Josué fasi shinancoinni. Ahuun sahuutifo fashnu fashnuani Diosin tsain nan casho muran nanua naman fuopacucahuani. Nan fari caitishon nanscai fuoshon nocon Ifo Diosi cufini. Israeli niaifo patasharinoafoanri nansca huanifo. Aton fuyamisi cuscan mai mapo aton mapomaqui huanifo nan shinancoiainfo cuscan ismashcaquin. ⁷Ascashon Josué nocon Ifo Diosi cufini isca huaquin, —Nocon Ifo Diosin, min nantifi iquina. ¿Ahuuscai min noco unu Jordán anoshon nuquiri ihuamun Amorreofoan noco rutunonfo? ¡Ohuashta! Non unimacuana unu Jordán ocuma futsa non nitua shara icuana. ⁸¡Ohua! Nocon Ifo Diosin, nan Hai ano icafoan noco yora ichofain nocon yora atirifo rutuafo. ¿Ascacun natianmun uhuun yorafo un raquiri yoitiroquin?

⁹Nan Cananeofo non nan mai futsa icanoafoan nicacani Hai ano icafoan noco finoncoianfo nanfori nocoqui fucashon noco tarati huayacushquicani noco rutuqui futsashcaquin. ¿Ascano mani futsafoan mihuunoa raqui shinanshquicanimun? Min ahuamamishti huatirofiacun shinantirofo mincai noco cushusharatiroma. ¿Ascacun min ahuusca huatiromun min ahuamamishti huatiro afanan mihuunoa shinanonfo? —ishon Josué nocon Ifo Diosi cufini.

¹⁰Ascatan nannori cufinfiaiton nocon Ifo Diosin cumani isca huaquin, —¡Funihuu! ¿Ahuuscai min fuopacuimun? ¹¹Min caifofoan ua chaca hua. Un mato yoiyoa man ua nica sharaiton un nan mato noिकासmafo nan mai anoshon un potashquin. Ascafia un mato yonoa cuscacai man aama. “Ahuara futsafo fiyamacahuun uhuuna fusti inon,” ishon un mato yoiifia futsan man fia. Man chania. Nan mafofo man onua. ¹²Ascano nan mato noिकासmaifo maton ranushumuao ichofain atirifi rutuafo. Un afanan mato fu iyamaino nan mato noिकासmaifoan mato finonshquin mato rutuqui futsashquin. Nan ahuara onuafo man rutuqui cuyoyamaino uncai afanan mato fu iishquima.

¹³Ascacun min caifofo yoihuun itisharanonfo aton chaca shatushcaquin un funamari ato yoishquin ai cuscan nicasharanonfo. Ato yoihuun isca huaquin, “Nocon Ifo Diosin mato yoi isca huaquin, ‘Man ua inanshquaiain cuscan mato murannoa futsan man fishon nan ahuara onua. Man nan yora chaca fuchiyamaino ato rutuqui cuyoshquin uncai afanan mato fu itiroma mato cushushquin nan mato noिकासmaifoan mato rutunonfoma,’” ishon nocon Ifoan noco yoi.

¹⁴Ascano funamari manifoti uqui fucahuun. Manifoti un oinfain ato murannoa yorafoti un oinfain nocofunufori un nantifi oinshquin. ¹⁵Ascano nan rato nocofunun a mafo onua fuchishon rutucahuun cooashcaquin. Ua fasi chaca huaquin. Un mato yoiyoa cuscacai ua nicama. Manfin Israelifoquin nan nocofunun mato muranshon aca cuscan fasi chacacoin. Asca a non nantifi ahuan yorafori man ato rutushon coatiroran, —ishon nocon Ifo Diosin Josué yoini.

Acán onaintima cuscan

¹⁶Ascan iyoconaino Josué nantifi Israelifo nan manifoti nocon Ifo Diosi ointafin ato ichanan huaino aqui funifo.

Judáfoan ahuun yora futsa nan chaca hua cuscan Diosin ato tapimani.

¹⁷Ascano Judá yorafo Zarafo Diosin tapimani aton murannoa futsa chaca huani. Ascan nantifi nan Zarafo fucashon Diosin tapimani nocofunu ahuun anu Zabdi ahuun yora futsafo murannoa futsan chaca huani. ¹⁸Ascano Zabdi ahuun yorafo nantifi Josué ointaifi funifo. Ascashon Diosin tapimani nan Carmi facu Acánfin chaca huaniquin.

¹⁹Ascatan Josué Acán yoini isca huaquin, —Tsain icocoin fusti yoihuun nocon Ifo Diosi noco yononi cuscan. Min ascafin minrifi min nocon Ifo Dioshuunoo yorafo shinanmasharatiroquin. Dioshuunoo yoisharahuun. Min aca cuscan noco yoihuun. Ua fomanyamahuun, —ishon Josué Acán yoini.

²⁰Ascaiton Acán cumani isca huaquin, —Icon un nocon Ifo Diosi chaca hua. Unfin isca huaquin. ²¹Non Jericó mai ano cuyoaitian un oian sahuuti fasi sharacoin mai futsa Babilonia anoshon futsan Jericó mai ano fuiton un oian. Nan ahudara shara un oian nan doscientos toro cuno oshopa facafacaitsa oinfain oro medio kilo un oian. Un fasi nanfo fuchipaicoinquin un nanfo fishon un onua. Natian uhuun pano pushu muran un mai hua. Nan sahuuti fasi sharacoin un mai hua nonanmanri un oro medio kilo non doscientos toro oshopafo facafacaitsa un mai huaitaran, —ishon Acán Josué yoini.

²²Nannori yoiaiton nicatan Josué nocofunufu nichini. Pano pushu ano

ichonifo Acán yoia cuscan nantifi ahuun pushu muran maiya fuchinifo. ²³Ascano nan pano pushu murannoa fuafo cuscan Josué futan nantifi Israelifoan aton ointaifi Acán onuni cuscan machinifo nocon Ifo Diosin ahuun ointaifiri nantifishon oinonfo. ²⁴Nansacatan Josué futan nantifi Israelifoan Acán iyofain nan sahuuti fofain doscientos toro oshopa facafacaitsa fofain nan oro fofain Acán ahuun facufo non moifo non burrofo non chashoanfo non ahuun pano pushu non nantifi aya cuscan Israelifoan machi rafu nushmancayan ahuun anu Acor ano ato iyonifo.

²⁵Ascatan Josué Acán yoini isca huaquin,

—¿Huuscai min noco omitsisca huamun? Na shafatan nocon Ifo Diosin mia omitsisca huairan, —ishon yoini.

Asca huatan nantifi Israelifoan Acán yafi ahuun yorafo non inafoya toquirinin tsacaquin futsaquin ato rutunifo. Ascashon ato coanifo. ²⁶Man cooi cuyoafono ato acamaqui toquirifo machinifo. Nantianri nanno nan toquirifo Israelifoan ato camaqui asca huafo oincal nocon Ifo Diosin afanan atoqui sinanima. Ascashon nanno anunifo isca huaquin, —Machi rafu nushmancayan ahuun anu Acor, —ishon anunifo. Nantianri nannori anumisifo.

Israelifoan Amorrefo rutuqui cuyonifo

10 ¹Josué Jericó anoa aton niaifo rutufain ahuun yorafoya non nan aton inafoya ato rutuquin cuyoconini cuscan nanscari huaquin nan Hai pushu rasi anoa icafo aton niaifo ahuun yorafoya ato rutuqui futsanifo. Nantianri Gabaonitafoan Israelifo yoini isca huaquin, —Non rutunonanonma. Non mato fu isharaino marifi man noco fucash huanonma, —icashu yoinonansharanifo

Gabaonitafo Israeli chaimashta icafo ini. Nan pushu rasi ahuun anu Jerusalén anoa aton niaifoan Adonisedec nafohuunoa nicani. ²Ascano nan niaifo futan ahuun yorafoanri nicacani fasi ratucoinnifo. Gabaonitafoan aton pushu rasi anunifo Gabaon. Nanno niaifo patasharinnoafo ichaparasi ini. Nannori yora ichapacoin. Hai anoafocai ichapa inima. Gabaón ano fasi paratama yora ichapacoin ini. Aton ranushumuafu fasi mutsisipacoin yora rutuqui tapicoianfo ini.

³Ascano Jerusalén anoa aton niaifoan Adonisedec niaifo futsafo cunu fomani. Hebrón icanoafo aton niaifo Hohan fomafain Jarmut icanoafo aton niaifo Piream fomafain Laquis icanoafo aton niaifo Jaffa fomafain Eglón icanoafori aton niaifo Debir cunu fomani. ⁴Niaifo Adonisedec ato cunu fomani isca huaquin, —Gabaonitafoan Josué yafi ahuun caifo Israelifo yoinonansharafo rutunanshacaquima. Ascacun uqui fucahuun non nocon ranushumuafu futan Gabaonitafo non rutui fonon, —ishon Adonisedec ato yoimani.

⁵Ascano nan mucu fustiti Amorreo aton niaifofoan ichanan huanifo. Jerusalén anoa niaifo non Hebrón anoa niaifo non Jarmut anoa niaifo non Laquis anoa niaifo non Eglón anoa niaifo ichanan huani aton ranushumuafu fu Gabón ano nonconannifo ato rutushcaquin.

⁶Ascan nan Gabaonitafoan Josué Gilgal anoa cunu fomani isca huaquin yoini, —Nonfin maton oinmatifoquin. Noco potayamacahuun. Amorreo niaifofoan aton ranushumuaya machifo anoashu nocoqui fucani noco rutushcaquin. Ascacun oriscahuun noco numashquin, —ishon cunu fomani. ⁷Nan cunu ointan Josué nantifi ahuun ranushumuafu nan rutumitsaqui

tapisharafo fu Gilgal anoashu Gabaón ano fonifo. ⁸Foaifotian nocon Ifo Diosin Josué yoini isca huaquin, —Atoqui ratuyamacahuun. Un yonoa cuscan mato tsoan ahuusca huatiroma. Manfin ato rutuquin futsaicain, —ishon nocon Ifo Diosin Josué yoini.

⁹Ascano nan yamutishon foshinifo Gabaón ano nocoshcaquin. Amorreofoancai tapinima Josué fu Israelifo atoqui nocoai cuscacai tapinifoma. ¹⁰Nantian mustairitanifo nocon Ifo Diosin ato shinanchacamanaino ahuuscain acanicain tsoacain tapinima. Ascashon Israelifoan Gabaón anoa ato ichapacoin rutunifo. Atirifi ichoaifoan Israelifoan fai Bet-horón anoshon ato mufainifo ato rutushcaquin. Gabaón anoashu chai Azeca yafi Maceda anoshon ato mufain rutunifo. ¹¹Nan mucu fustiti Amorreo niaifofo futan aton ranushumuafuya ichoaifoanno nocon Ifo Diosin nai muranshon unu matsi tocoro uhuapacoin atoqui potaino ichapacoin nai futsunifo. Israelifoan ato nopun rutua finonmacaifain nocon Ifo Diosin unu matsi tocoronun uhuapacointon fasi ichapacoin ato rutuni.

¹²Ascano nan shafata nocon Ifo Diosin yonoa cuscan Israelifoan Amorreofo rutuqui cuyonifo ato mai fianshaquin. Ato mufaintan Josué Israelifoan aton ointaifi Ifo Diosi cufinquin isca huani, —Farin, Gabaón amanaonri nitunhuun. Oshun machi rafu nushmancayan ahuun anu Aialón amanaonri nitunhuun, —ishon nannori Josué yononi.

¹³Nannori yoiaino fari yafi oshu nanno nituyoni Israelifo ato noिकासmaifo rutuqui cuyoaifotian.

Nannori Justopan libroqui cununi isca huaquin, —Fari masafinin ano fari nituyoni shafa fusticai cayonima,

—ishon cununi. ¹⁴Tsoancai ascara oinyomisima. Afananricai ascamisima. Rato nocofunucai Ifo Diosi cufianno fari yafi oshu nitumanima. Icon nocon Ifo Diosin Israelifo noicasmaifo ato rutumaqui cuyoni.

¹⁵Ascatan Josué Israelifo fu Gilgal ano nasonifo.

**Josué Israelifo yoini cuscan
ahuun tsain unutaqui**

23 ¹Man fari ichapa finoano nocon Ifo Diosin yonoa cuscan nan Israelifo noicasmaifoancai afanan ato fucash huanima. Nantian Israelifo isharacoinnifo. Nantianri Josué anifocoin ini. ²Ascano Josué nantifi Israelifo cunani aqui funonfo. Ato niaifo patasharinaofoya nantifi ato cunashon yoini isca huaquin,

—Unfin natian anifoshtaquin. ³Nocon Ifo Diosi caifo futsafo matohuunshon aca cuscan man man nantifi oinmisi. Maton Ifo Diosin mato noicasmaifo mato rutumaquin cuyoni. ⁴Mani futsafo man non rutuqui cuyofain mai futsa anoafori man non ato pota. Ascashon nantifi nan mai un mato pashcanan huapashquin. Unu Jordán chaicoin nan ununhuan Mediterráneo fari iquiaiquiri un mato pashcanan huashquin. ⁵Nan ratoran caifo futsafo man ato mai anoshon potataima nocon Ifo Diosin matohuunshon ato potashquin man ato mai fiinon. Nannori maton Ifo Diosin mato yoyioni.

⁶Ascan ahuun curushhuunshon mato amapaiyai cuscan huafafaincahuun. Moisés libro muran mato cunushoni cuscan nantifi nansca huacahuun. Nan cununi cuscan ahuara futsa shinanyamacahuun. Nan fusti tanasharacahuun. ⁷Mani futsafo matomaquinoashu foataifoma ato fu rafuyamacahuu. Aton diosifo rami

huafo aton anuhuunshon ahuara yoyamacahuun. Aton anufori yoyamacahuun. Nanfoqui fuopacucahuayamacahuu aton oinmatifori iyamacahuu.

⁸Ascataamarocon nan man amisi cuscan nocon Ifo Diosi fusti fu rafucahuun.

⁹Nocon Ifo Diosin matohuunshon caifofo mutsisipacoinfo aton yora ichapafoya aton mai anoshon ato potani. Nantiaricai rato caifofoan mato nitumatiroma. Maton Ifo Diosin matohuunshon ato rutumisi. ¹⁰Ascano fustifiashon nan yora futsafo mil nocofunufociacun man ato ichontiro. Nocon Ifo Diosin matohuunao caifo futsafo matomaquishon potashquin man aton mai fiinon. Nannori nocon Ifo Diosin mato yoyoni. ¹¹Ascacun oinfain maton Ifo Diosi noicoincahuun.

¹²Ascafia man nocon Ifo Diosi cachiquiri huaiton nan caifo futsafo mato muran nituaton aton ainfofoya fianancain ato fu man rafushcaquin.

¹³Man ascaquifin man tapitiroquin nocon Ifo Diosin afanan nan mani futsafocai matomaquishon potashquima. Ascano nanfoan maton trampa muran pacumani cafisca huatiro. Mato fichiquin tuchiaton maton catu coshai cafisca huafain maton furo mosha chachi cafisca huai. Man afanan nan mai shara nocon Ifo Diosin mato inanniano afanan itamarocon man nai futsushcaquin.

¹⁴Natian mun samamashta nai. Man manfin maton nomuran tapicoianquin nocon Ifo Diosin mato yoyoni cuscan nanscacoïn mato huashomisi. Mato yoimisi cuscacai mato huashoyamamisima. Nantifi man mato ashomisi. ¹⁵Ascafia mato yoyoni cuscan man ahuun tsain nicasharaino mato shara huashoshquin. Nanscarifi ai man ahuun tsain cachiquiri huaacun

icocoinri mato yويمisi cuscan mato onaintimashquin na mai shara ano mato inanni anoshon mato namaquin cuyoshquin. ¹⁶Nocon Ifo Diosin mato yoiyoni cuscan nannorisi man shinanyamaino caifo futsafoan ato diosiran ishon rami huafo man fuoshopacucahuanaiton nocon Ifo Diosin matoqui sinacointaquin nan mai shara ano mato inanni anoshon mato potaquin cuyoshquiran, —ishon Josué ahuun caifo Israelifo yoini.

**Josué afanan ahuun tsain unutaqui
Israelifo yoini**

24 ¹Ascano Josué ato yoini nantifi Israeli manifoti Siquem ano ato ichanan huani. Aton niaifo patasharinoafori ichanan huani Diosi ointaifi funifo.

²Ascashon Josué nantifi Israelifo yoini isca huaquin, —Israelifoan nocon Ifo Diosin mato yoi isca huaquin, “Fari ichapacoin finonni maton shunifoan unu Eufrates ocuma futsa icafo ini. Ua cufintamarocon nan rami huafo cuscan cufinnifo. Nanno maton shunifo Taré yafi furun rafu Abraham yafi Nacor ini. ³Ascacia un maton shuni Abraham nan mai anoshon ihuuni mai Canaán ano cahuacacaini. Unfin Abraham ahuun funafo ichapacoin inan. Unfin Abraham Isaac inanniquin. ⁴Ascatare un Isaac furun rafu inanni Jacob yafi Esaú. Un mai machifo ahuun anu Seir Esaú inanni. Ascafiano Jacob fu ahuun furunfo Egipcio mai ari fonifo.

⁵“Ascano un Moisés yafi Aarón atoqui nichini. Nantian un Egipciofo omitsisca huashon un mato Egipcio mai arishon ihuuni. ⁶Un mato shunifo Egipcio mai anoshon ihuuni ununhuan oshin ano noconifo. Ascan Egipciofoan aton caballofo non aton taramutifoyashon ato mufaini ununhuan oshi ano atوقي

noconifo. ⁷Ascan maton shunifoan ua fasi cufinnifo un ato numanon. Ascano un ato yafi Egipciofo faquishihuan nushmancayan huashoni Egipciofoan ato oinnonfoma. Ascashon un unuhuan oshi muran Egipciofo asamani nai futsunonfo. Un Egipciofo asamani cuscafin man man oinniquin.

“Ascano man fari ichapa tsoa istaipama ano iyopaoni. ⁸Nan Amorreofo unu Jordán fari oaiquiri icafo ini. Un ato mai ano mato iyoni. Nanfo matoqui funifo mato rutushcaquin. Ascacia uhuunshon man ato rutuqui futsani. Uhuun curushhuunshon man ato rutuqui cuyoshon aton mai fianni.

⁹Chipo Zipor facu Balac nan Moab mai anoa niaifoan mato rutupaini. Ascano niaifo Balac Beor facu Balaam cunani ua cufinon un mato chaca huanon.

¹⁰Ascafia un Balaam nicapainima. Ascan Balaam matohuunoo tsain chaca huatamarocon matohuunoo tsain shara yoi fafainni. Balaam mato chaca huapaifiacai un yonoa cuscan huanima. Un mato numani mato chaca huanonma.

¹¹“Ascana man unu Jordán pocufainni Jericó mai ano man noconi. Nan Jericó anofo matoqui funifo mato rutupai. Jericó anofoan mato rutupai cuscan nanscari huaquin Amorreofo non Ferezeofo non Cananeofo non Hititafo non Gergeseofo non Heveofo non Jebuseofori mato rutupainifo. Mato rutupaifiiafoan un ato nitumani nan mato rutuafoamarocon man uhuunshon ato rutuni aton mai fiishquin. ¹²Man aton mai ano nocoatima un tau huaquin ato ratumani. Aton niaifo rafu man ato mai anoshon man potanon. Ascano mancai maton nupu non mato piacatifoyashon ato potamarocon unfin ato mai anoshon ato rutui cuyoniquin.

¹³“Ascana mancai aton mai anoshon yonopaonima. Nan pushu rasi

huayamafiashu man ato mai ano ica. Man aton fanafo fanayamafiashon man aton fanafo pifafainni. Unfin aton mai mato inan. Ascacun natian matonaran,” ishon nocon Ifo Diosin noco yoini.

¹⁴Nocon Ifo Diosin noco yoia cuscan man man nican. Ascacun Diosihuunoa shinansharafain a nicasharacahuun noco yonoai cuscan non huanon. Unu Eufrates fari iquaiquirinoa yafi Egipcio ano nocon shunifoan dioscoinma cufinnifo. Manrifi asca huayamacahuun. Nan rami huafo potacahuun. Nocon Ifo Diosi fusti cufinfain mato yoiai cuscan fusti huacahuun.

¹⁵Ascan man nocon Ifo Diosi tanapaiyamaquin catoncahuun tsoan oinmatimain man ipaicain. Unu Eufrates fari iquaiquirinoa maton shunifoan dioscoinfoma aton oinmati ipaonifo. Ascano nan Amorrefoan aton dioscoinfoma man aton oinmati ipairaca. Nantian Amorrefo mai ano man ica. Ascacun catoncahuun rato diosmain matona itiroquin mato yoia cuscan man anon. Ascafia un non uhuun yorafoan non nocon Ifo Diosi fustiton noco yonoa cuscan non huairan, —ishon Josué Israelifo yoini.

¹⁶Nannori nicatan Israelifoan Josué cumani,

—Noncai nocon Ifo Diosi potanacama. Dioscoinfomafoancai noco yonotiroma.

¹⁷Nocon Ifo Diosin noco yafi noco shunifo nan mai Egipcio anoshon noco ihuuni. Egipcio mai anoashu non fasi omitsiscapaoni aton yonomatifo non ipaoni. Ascacun nocon Ifo Diosin noco Egipcio mai anoshon noco numani. Nocon Diosin ahuamamishti tosa futsa atiroma cuscan noco ismani. Non Egipcio anoashu nuno non oaitian caifo futsafo aton maifo finon fuaiton nocon Ifo Diosin nantishotapiquin noco cushusharamisi. ¹⁸Nan caifo futsafo

Amorrefo aton mai anoshon nocon Ifo Diosin ato potani nococai ahuusca huanifoma. Aton mai nocon Ifo Diosin noco inanni. Nanscacufin norifi nocon Ifon Diosi noco yonopaiyai cuscan non acoinnicain. Arus fustifin nocon Diosiquin, —ishon Israelifoan yoinifo.

¹⁹Ascaiton Josué ato cumani isca huaquin, —Mancai nocon Ifo Diosin ahuun oinmatifo itiroma. Mato yonoai cuscan man atiroma. Aafin shara fustiquin. Ahua chacacai a fu itiroma. Arus fustifin maton ifo ipaiquin. Man ahuara futsafo ifoaino matoqui sinatiro. Mato yonoai cuscan man huayamaino man aqui chaca huaitoncai mato rau huashquima. ²⁰Man nocon Ifo Dios potashon caifo futsafoan aton dioscoinfoma nan rami huafo man aton oinmati icai mato yonoai cuscan man aiton. Man ascaiton nocon Ifo Diosin mato shara huamisifiashon mato omitsiscamashquin mato namaquin cuyoshquiran, —ishon Josué ato yoini.

²¹Nannori nicatan Israelifoan Josué cumanifo,

—iMa! Noncai dioscoinmafoan aton oinmati iquima. Nonfin nocon Ifo Diosi fustiton ahuun oinmati iquicai noco yonoai cuscan non huairan, —ishon cumanifo. ²²Ascatan Josué afanan ato yoini isca huaquin,

—Man yoia cuscan nocon Ifo Diosin man nican. Man yoia cuscan marifi man tapia. Ascacun nanscahuapacacahuun. Man yoimisi, “Nocon Ifo Diosin ahuun oinmatifin non iquicai noco yoiai cuscan non aquiran,” —ishon man yoia. Ascaiton cumanifo isca huaquin, —Icon. Nannori man non yoia nocon Ifo Diosi noco nicaino man non tapiaran, —ishon Israelifoan yoinifo.

²³Ascaiton Josué ato cumani isca huaquin, —Man yoia cusca iconmainquin caifo futsafoan aton dioscoinfoma

potacahuun. Nocon Ifo Diosi yoicahuun isca huaquin, “Ifo Diosin, nonfin min oinmatiquin. Min noco yonopaiyai cuscan non mia ashoshquin. Min nocon Ifo. Min nocon Diosin. Nocon nomuranshon non mia fasi noicoin,” nannori nocon Ifo Diosi iconcoin fusti yoicahuun, —ishon Josué ato yoini.

²⁴Ascato afanan cumanifo, —Nonfin nocon Ifo Diosi ahuun oinmati iishquin noco yonoai cuscan aashquin. Noncai yoitima ipaima. Non ahuun tsain nicasharacoin noco yonoai cuscan non anon, —ishon yoinifo.

²⁵Ascatan Josué nan shafata Siquem ano Diosin ato yononi cuscan cunushoni nocon Ifo Diosi ismashquin arus fusti aton Ifo tanasharanonfo. ²⁶Ascan yoini cuscan Josué ato libro ashoni a muran Ifo Diosin ato yononi cuscan cunushoni. Asca huatan Josué toquiri uhuapa fini ihui ahuun anu encina naman ichananti pushu chaima huani. ²⁷Ascatan Josué Israelifo yoini isca huaquin, —¡Oincapon! Man nocon Ifo Diosi ahuun ointafin yoia cuscan nan toquiri

oin cafiscaquin man nanfohuunoa shinantiro. Man na shafata nocon Ifo Diosi yoia cusca man huayamaiton na toquiri man oin cafiscaquin man shinantiro nocon Ifo Diosin mato yonoa cuscan man huamaran, —ishon Josué Israelifo yoini.

²⁸Ahuun tsain yoiquin anaitishon Josué ahuun caifo Israelifo nichini nan mai nocon Ifo Diosi ato inan ano fotanonfo.

Josué nani cuscan

²⁹Ascato chipo Diospan oinmati Josué nan Nunpan facu ciento diez fariyashu nani. ³⁰Nan nocon Ifo Diosi Josué mai inanni ahuun anu Timnat-sera. Nanno Josué mai huanifo. Nan mai Efraín machifo ano machi futsa ahuun anu Gaas fari oai istafariri ini. ³¹Josué niyoatian niaifo patasharinofo nataicanima aton caifo Israelifoan nocon Ifo Diosi nicacoinnifo nan ato yoini cuscan huanonfo. Nocon Ifo Diosin ato shara huashomisi cuscan man man muumisi.